

Kayëta ir Šak in

Lilaya in

Akayëta aŋo Šak, asëfan abät ar Axwën Yesu, yëgwën babi bërëwäk bën, ðek ang šapërära këni ed ex Owun or Bërom ak. Paß gë akayëta ano sëyali këbi end ekwëta do gë end bandixa eŋ. Mëŋ yëgwaxën ko mëne: ax gi ex na mocus axaÿënaxik an do eyo ŋan ar gë napul an fo. Bëte aÿëgw ko mëne ar balëkënalind cale an, kaðacëlexo aniw andexëm aŋ, mëne ngëŋ tebëlexo asëk ayeÿandërand fo in. Bëte kërexo dafënarand na. Do angëmëne ar šotërak hi ko, diyindëlexo benjekax gë napul irexëm in.

Er ex gër akayëta in:

End orenik do gë oñandi oñëŋënaŋ eŋ: 1.1-27.

End epëb ed bela el, ekwëta el, do gë bandixa eŋ: 2.1-26.

End ekamën ed eyeyan el do orenik or yaf aŋ eŋ: 3.1-18.

End ekwëÿëta ed ndafënan do gë odenar eŋ: 4.1-12.

End bër gë napul eŋ: 4.13-5.6.

End ebuŋan do gë cale eŋ: 5.7-20.

Ecëmar el

1 ¹ Wëno Šak, ariyenin ar Kaxanu do gë Axwën *Yesu *Kërisët an, këŋun yëgwënëlinð wën bandëwëra Epëxw gë baki band bulunda ir Kaxanu band yëcarëk baŋ. Ašëma këmun šëmand!

End ekwëta do gë orenik eŋ

² Bëmaÿe bëndam, nëngandërayindëleŋun mbaŋ në end batëÿ bandanjëm band këŋun hatënegund eŋ. ³ Nangin mëne mondako kën sëyand ebuŋa el angëmëne ekwëta edewën el ga xemëk bayik gër atëÿ. ⁴ Xarak, ebuŋa el afo ex ŋata andiyen andexëm aŋ en gixën bër gë ola or faÿayak, bër šenene gër ex yo, do yowëÿ an can na. ⁵ Angëmëne ang hi, abät exo can orenik ol, karaleŋo Kaxanu, mëŋ ar këŋo yëlënd ayël fo ar ex yo, xarak aŋo dexëra ex na; do ayël dëŋ këŋo yël. ⁶ Barikan karaleŋo ðe gë ekwëta, gë oŋëpëgënan këm gayik ar kë xarand gë oŋëpëgënan an, ang men ond angwëngw ond kë šangënenð do kë xaninënd ekoc fo hi ko. ⁷ Ala arako rako an kërexo yëlënd na yëÿ ko šot na gër Axwën: ⁸ ar kë sëkwanënd exo tana anjëlan amat fo hi ko, ar kalay-kalay gër ðek bandixa bandexëm hi ko.

End axaŷĕnaxik do gĕ ar gĕ napul eŋ

⁹ Imaŷe ikĕreceŋ ind xaŷĕnĕk iŋ, nĕngandĕrayindĕleŋo gayik Kaxanu kĕŋo yĕlĕnd or gapak ol. ¹⁰ Barikan imaŷe ind ex gĕ napul iŋ nĕngandĕrayindĕleŋo gayikako nĕ end Kaxanu ko banaxĕnĕnd ga nang ko mĕne axuca ko xuca ang opĕtĕfĕt od ondĕs fo. ¹¹ Ax gi ex na nde and kĕ fĕn eŋan aŋ, oyat oyĕkax ok aŋaŷĕn kĕ haŷĕnĕnd ondĕs oŋ, opĕtĕfĕt ok ex binira do oye orexĕm ol ex biw? Ata mondako fo ex end ar gĕ napul eŋ, abiw ko biw gĕr bandixa bandexĕm.

End banajĕta eŋ

¹² Nĕngandĕralindĕleŋo ar kĕ buŋand gĕr atĕy an! Enimin, ar buŋak gĕr atĕy aŋ, Kaxanu afupa kĕŋo fupand gĕ ekamote ed angora el, mĕne ngĕŋ aniyand and din ir din and beŷa ko ayĕl kĕbi yĕl bĕr ĥan kĕŋo aŋ. ¹³ Ala ar kĕŋo naŋĕtand an, kĕrexo dend na: «Kaxanu ke naŋĕtĕnd!» Gayikwa eŋĕŋĕnax gematak ax kor na eŋo naŋĕt Kaxanu. Bĕte mĕŋ dĕŋ ala gabatak aŋo naŋĕtĕnd na. ¹⁴ Barikan ala kala gĕ andexĕm ko naŋĕtayand, and ko yĕlaya gĕr er ŷandi kĕŋo, do gĕr er ŷetĕŷet kĕŋo aŋ. ¹⁵ And ko sĕf ala oŋandi oŋĕŋĕnax aŋ, oŋandi oko kĕ rĕwĕnd eŋĕŋĕnax eŋ, do eŋĕŋĕnax eŋ and kĕ fanĕta aŋ ex mĕlaw ecĕs el.

¹⁶ Wĕn bĕmaŷe bĕnd ke balĕnd mbaŋ bĕŋo, kĕren yifayand na: ¹⁷ oyĕl oxĕbĕnĕnaxik, gĕ oyĕl oyekax or ex yo, ŷaŋ gĕr Faba ir bangoben kĕ xaniwĕnd. Mĕŋ axo nĕngwĕtand na, axo dĕbĕnd na. ¹⁸ Gayikako Kaxanu, mĕŋ dĕŋ faŷĕk gĕr emĕkw edexĕm ex gi mondako, gĕ eyeyan ed dal el rĕw kĕbo, ene gixĕne bĕŷanar gĕr dek bebĕr nĕcĕtĕgu ko do xwĕn ko bĕn.

End ebaxĕt ed eyeyan ed Kaxanu eŋ

¹⁹ Wĕn bĕmaŷe bĕnd ke balĕnd mbaŋ bĕŋo, nangiŋ mĕne ala kala gilexo ar ŷandĕk ebaxĕt, ar legĕk eyeyan, ar ax koŷĕnd na aŷand. ²⁰ Gayikwa oxoŷ or ala ol ax dind na er ex ŷenene gĕr Kaxanu in. ²¹ Bĕte, ga kĕn xwĕŷĕtand ako emuyaraxik end ex yo, do eŋĕŋĕnax end ex yo, kwĕtayayin gĕ onden onjekax eyeyan ed Kaxanu, ed lĕgĕk gĕr oŷĕkw orewĕn el, eyeyan ed xorĕk eŋun pexĕn el.

²² Kĕren yifayand na gĕ andewĕn, diyindĕn ari dĕŋ ang kĕ rend eyeyan ed Kaxanu ak, kĕren baxĕtĕnd na abaxĕt fo. ²³ Enimin, angĕmĕne ala exo baxĕtĕnd Eyeyan ed Kaxanu el do axo dĕyand na ang kĕ rend ak, er hi ko ang ar kĕ nĕkonĕnd dĕxas irexĕm in nĕ anangoye fo do ko watayand ang hi ko ak. ²⁴ Barikan and

ko nëkonaya aŋ, ataŋ exo kwëya ang hi ko ak, and ko ye aŋ.

²⁵ Barikan ar kë y'ëkwand gër acariya and ŝenene an, acariya and kë yëlënd orëy'aya aŋ, abalëkënali ko balëkënalind er ko watënd in. Ari ko rind ang kë rend ak, axo baxëtënd na abaxët fo do kwël exo kwëya. Ata ala ajo anëngandëra kë yana enjo nëngandërand gër dek beber ko rind.

²⁶ Angëmëne ala exo yëland mëne ašalek hi ko xarak asëk ayey'andërand fo wër këŋo, mëŋ dëŋ kë yifayand. Ata cale indexëm iŋo ofëcak këm ex. ²⁷ Cale imënëk iŋ, ind ex d'al gër lëngw Faba Kaxanu iŋ ex: edacët ed gër ocëmu bëtox bëndëkak, gë bësoxari bësebëta sebëta el do gë ekwëyëta ed dek betëmbak bend gër ngwën el.

End epëb do gë eyaf ed bela eŋ

2 ¹ Bëmaÿe bëndam, epitëndër ed bela ax gi ex na gër ekwëta ed xwëta këno *Yesu *Kërisët, mëŋ ar ex Axwën ar gë enjaran an. ² Gako bela bëxi eni dilëli gër amara andewën: aÿanar an exo dënaw anëna and kaŋe, do exo cudaw banjëm banjekax; axinëm an exo gi axaÿënaxik, do exo cudaw mëŋ bëte banjëm bamuyaraxik. ³ Ata wën eŋun bal nëmëc end ar gë banjëm banjekax eŋ do eno pel: «Wëj yow ey nëpa ro gër ed këni yëpand bër gapak!» Barikan eno pel axaÿënaxik an: «Wëj cëŋ y'el ey kwëšax fën!» ba «Nëpal gër ebar ro, gër ed këme wëñërand ro!» ⁴ Ax gi ex na nde epitëndër ed bela el ex mondako? Do ax gi ex na nde bëxiti bësämbak hi kën?

⁵ Wën bëmaÿe bënd ke balënd mbaŋ bëŋo, awël nde: Ax gi ex na nde Kaxanu yata këbi bër ex bëxaÿënaxik ogës od bela bër gër ngwën ro bën? Ax gi ex na nde mëŋ yata këbi eni cotaxën mbaŋ ekwëta el? Ax gi ex na nde mëŋ yata këbi eni gixën šëf gër owun or bey'a këbi bër ħan këŋo ol? ⁶ Barikan wën, ašëfënin këno šëfëninënd axaÿënaxik an! Ax gi ex na nde bër gë napul bën këŋun rixërand? Ax gi ex na nde bën këŋun wëland gër kiti? ⁷ Ax gi ex na nde bën ex bër kë renand o'wac oyekax or yël kënun Kaxanu ol?

⁸ Enimin, ŝenene kën rind angëmëne asëf sëf kën er kë rend acariya and Emun in gër O'ňëgw Omënëk: «Balindëlexi end ašandax eŋ ang ki balënd end gaf irey' ak^a.» ⁹ Barikan angëmëne pit pit këñëbi fëbënd bela bën, a'wen kën wënënd do acariya aŋ anëka sëra këŋun ga lif kën ako. ¹⁰ Enimin ar kë sëfënd dek er rek acariya in, barikan exo d'if apela amat, anëka lif ko dek acariya

aŋ. Ar kē lif apela amat xarak aye sēf ko đek bacēxen baŋ, acariya aŋ anēp kēŋo nēp gayik đek baŋpela baŋ lif ko. ¹¹ Gayikwa ar rek: «Ax gi ex na mondi orekar an» fo rek bēte: «Ax gi ex na monaŵ ala». Awa angēmēne wēj aŋ di ex na orekar ol barikan eyo đaŵ ala, anēka wēndēra kēŋ pab acariya aŋ. ¹² Awa mēŋ ex, yeyandērayindēn do diyindēn beŷ bēn ang bela bēr kēnēbi xiti gē acariya and kē yēlēnd orēŷaŷa fo ol. ¹³ Gayikwa ar kē xitind gē axaŷēnan kēm an, Kaxanu gē axaŷēnan kēm kēŋo xiti mēŋ bēte. Barikan axaŷēnan in wēñak kiti iŋ.

End ekwēta eŋ

¹⁴ Bēmaŷe, ineŵa kēŋo fēca ar kē rend mēne aŝot ŝot ko ekwēta an xarak ekwēta elo ax gi ex na gē bandixa? Afexēn nde kēŋo fexēn ekwēta elo? ¹⁵ Angēmēne imaŷe iŋ, hi ko itoŝan, hi ko itoxari, exo can baŋjēm band ko ŝuđa, ba exo can er ko ŷamb key yo key in, ¹⁶ do abāt ang hi kēn ak eŋo pel: «Awa gwēre, ŷeyin gē emēkw eyemax! Aŷem kē ŷemēnd đe, cuđarayin do ŷambērayin xali en med!» Gayikako mēŋ dēŋ aŋo yēl ex na er ŷapēk in, ofēcak nde ex na? ¹⁷ Ata mondako fo ex đe end ekwēta eŋ: ekwēta ecēsēk ex angēmēne ar ŝotēk an ŷoweŷ axo dixēnēnd na.

¹⁸ Barikan bamat ala kē re na: «Wēj ekwēta el ŝot kēŋ do wēno bandixa baŋ. Masinēle ekwēta edeŷ ed gē bandixa kēm el, ata wēno gē bandixa bandam baŋ kēmi wāsin ekwēta el.» ¹⁹ Ax gi ex na nde aŵa wā kēŋ mēne Kaxanu ibat fo ex? Awa aye yek: bēyēl bēn bēte aŵa wā kēni eŋo do kēbi rēgēndērand. ²⁰ ŷandi ki nde ey nang wēj ar gē onden okafēxaf ajo mēne ekwēta ed ar ax dind na bandixa baŋjekax el gē ofēcak kēm ex? Axi ñandi ex na nde ey nang? ²¹ Aŷ nang ex na nde mēne *Abēraxam, axarēk arebi an dēŋ, nē end er ri baxo in hixēn ko ar ŝenene gēr ogēs od Kaxanu? Ga wēđ baŋo asēñiŵ *Isak eŋo cađaxa gēr angēb. ²² Wat kēn mēne ekwēta el do gē bandixa baŋ andamat bax riyenind ex paŷayaxēn ekwēta el. ²³ Mondako ĥata bax Oñēgw Omēnēk od rek: «Abēraxam, ga xwēta baŋo Kaxanu hixēn ko ar ŝenene gēr ogēs odexēmb.» Do nē eŋo kēno wācaxēnēnd lawo ir Kaxanu.

²⁴ Watin mēne nē end bandixa band ri ko, ko hixēnēnd ala an ar ŝenene gēr ogēs od Kaxanu, ax gi ex na gē ekwēta el fo. ²⁵ Bēte asoxari ar hi bax aŷacaxik ar bano wācēnd Raxab an, ahi hi baxo ar ŝenene gēr ogēs od Kaxanu nē end bandixa band ri baxo. Ga xaca baŋi wa bērolaŵēn Bēyisērayel bēn do fel baŋi eni maŷi fēña iŝēxe. ²⁶ Angēmēne eman end ala eŋ, onjēn kēm ex, ecēsēk

ex. Andamat ex end ekwëta eŋ, angëmëne gë bandixa këm ex, ecësëk ex.

End aniw eŋ

3¹ Bëmaÿe bëndam, këren gi na fa dek bësëÿali fo. Nangin mëne kiti ind biyi bësëÿali iŋ gë pit fo kē yëka. ² Biyi dek alif këne lifënde bandanjëm. Angëmëne ala ex na ar bayik ax difënd na gër eyeÿan, anëka faÿaya ko gër or ŝenene. Axor ko xorënd exo mëlaya dek eman endexëm eŋ. ³ Angëmëne ayapën kënebe yapënënde dun opanac ok eni maxënënd eni di er ÿandi këbo in, gë beman bendebën ak kënebe lasënde. ⁴ Bëte awat nde wat kën okuluŋ ok: ado ga rafëk yo, ado ga kē fimërand bongoc botëm fo, gë amërëŝaya atil kē xasënd gand ed këŋo ÿandi ahëreli an. ⁵ Andamat ex end aniw eŋ: ado ga hik esil gër eman, barikan bebësëm kē soŝanand. Bëte watin mëne ingodux itil kē ŝorënd akwët atëm! ⁶ Xarak aniw aŋ ex bëte xodux ex, ngwën ind betëmbak ex. Aniw aŋ wal ir eman ex, barikan abuyarën kē buyarënënd dek eman eŋ, do aŝor kē ŝorënd ola ol gë xodux or kiti ol. ⁷ Owacar or ex yo, hi këni or xaða-xaða, hi këni or gër men, hi këni bacël, ala an axor xor ko ebi nambin, do ari dëŋ ri ko mondako. ⁸ Bari aniw aŋ, ala ax kor na ex nambin: eñigëanaxik end ala ax korënd na ex; yer ongwëc ond kē lawënd fo ex. ⁹ Gë aniw aŋ këneŋo ŝalende ar hik Axwën arebi do Faba irebi an. Bëte gë aniw aŋ fo kënebe xarende bela bër ri këbi Kaxanu gër eñaw endexëm bën. ¹⁰ Nē etëÿ ebat kē ŝanëgund obetak ol do gë ekare el. Awa bëmaÿe, ax ñap ex na ex gi mondako. ¹¹ Nē añësa amat nde kē ŝanëgund men onëngax oŋ do gë men ombax oŋ? ¹² Bëmaÿe, andan aŋ ax dëwënd na oÿarëka; atëx and *reŝeŋ aŋ ax dëwënd na ondan. Gër añësa and men ond gë ongal ax canëgund na men onëngax.

End orenik eŋ

¹³ Noÿo renik, do noÿo ex ar gë onden an, mërëxand irewën? Awa ala ajo nēcëtindëlexo bandixa banjekax bandexëm baŋ gër ola or ŝenene orexëm, gë obëngw or onden do gë orenik. ¹⁴ Barikan angëmëne gër owëkw orewën xëñëk wayët oÿakëraxi, gë oxoÿ, ba gë ebal ed gaf irewën fo el, këren dafënarand na. Gayikwa angëmëne mondako ex, end ðal eŋ kën ŝonënd nē enëgwëŝ en. ¹⁵ Orenik olo ax gi ex na or xaniwëk ÿaŋ gër orën: orenik or gër ebar ro fo ex, or ala fo ex, or ŝabucara ex. ¹⁶ Enimin, gër ed ex oÿakëraxi do gë ebañër, na fo kē hind bëte bënd ŝode-ŝode beŋ, do gë etëmbak end ex yo. ¹⁷ Barikan orenik

or xaniwëk yʼaŋ gër orën ol er ex gë oŵënëk, gë aketëxeta, gë angwëlëra, gë onden, gë axaÿënan isëm, gë benjekax, gë epitëndër këm, gë orenik or dʼal, do gë eñëjënax end ŝonayak këm. ¹⁸ Xarak, bër ŝenene bën kē nefënd aketëxeta aŋ gë ola or bëraketëxeta bën.

End oxalay-kalay eŋ

4 ¹ Feye wa kē xaniwënd batakëra baŋ do gë oxeÿër oŋ mërëxand irewën? Ax gi ex na nde beber han kën bën kē xaxërënd dek eman endewën eŋ? ² Er han kën in, an cotënd na, ata en dëb gë oyakëraxi ol, eno daŵ ala; barikan ŷoweÿ an cotënd na. Ata en baŝ oxeÿër oŋ do gë batakëra baŋ, bari ŷoweÿ an cotënd na gayik ano karand na Kaxanu. ³ Ado eno kara, aŋun yakalind na gayik ang kën xarand ak, ax ye ex na. En dixënënd beber han kën këno xarand. ⁴ Ata wën ang bër rind orekar fo hi kën! An nang ex na nde ar hanëk ngwën an, Kaxanu aŝus këjo ŝusënd? Awa ar faÿëk gër emëkw edexëm exo gi ahan ar ngwën an, awa arangoÿëra and Kaxanu hi ko. ⁵ Ako nde yëla kën are fo kē rend Oñëgw Omënëk ok: «Kaxanu ahan han këjo, xali këjo yʼakëraxind angoc and yël këbo aŋ exo dëg gër ola orebi aŋ.» ⁶ Barikan oyekax or yël këbo ol rafëk nëmëc, ang kē rend bëte Oñëgw Omënëk ak:

«Kaxanu aŵereli këbi wërelind bër kē rafënarand bën,

barikan oyekax orexëm ol këbi yëlënd bër kē banand bën^c.»

⁷ Awa mayindën aŵa end Kaxanu eŋ; ñëpindën end ŝabucara eŋ, ata këjun hër caw. ⁸ Tëkayino Kaxanu ata këjun sëka mëj bëte. Wën bëwendëran bëjo, mënënin otaxan odewën ok, do wunëtin oŵëkw orewën oŋ, wën bër gë benjëw bend kalay-kalay bëjo! ⁹ Nangin mëne and xaÿën kën dëj ex, denitayindën, tesindën! Olëŝ orewën ol nëngwëtal ex otes, do onënga orewën ol nëngwëtal ex ecamina! ¹⁰ Banayin gër lëngw ir Axwën, ata këjun fela yʼaŋ.

End odenar eŋ

¹¹ Bëmaÿe, ax gi ex na mondenar andewën rewën aŋ. Ar këjo renand, ba këjo nëpënd imaÿe indexëm an, anëka ko renand acariya aŋ, do axiti ar acariya hi ko. Angëmëne axiti këÿ xitind acariya aŋ, axiti hi këÿ, aÿ bo ex na afëb ar acariya. ¹² Gayikwa abat fo ex anëcët ar acariya an, do mëj fo ex axiti an. Mëj gabat

xorëk enjo pexën ala an do enjo nemin. 'Barikan wěj noŷo ngwa hi këŷ ga këŷo xitind ako, aŝandax?

End ndafënan enj

¹³Awa gërëgako baxëtine, wën bër kë rend: «Doro ba ecan gër angol aŷo këne ŷeye, yer iniy inj këne ŷëpaxëye fën. Ari këne ŷana ene dinde bebër këne ŷotëraxëne napul, do mbaŷ këne ŷotëraye.» ¹⁴Er këŷun hi ecan ecan in, an nang ex na? Enimin, er hi kën ang okëbina od kë ŷanayand, do kë nëkand təkër fo ex capëraxën. ¹⁵Ecëñëxët er don rend: «Angëmëne Axwën an aŷa ŷa ko, aliya këne liyaye, do enjo gë enjo këne ride.» ¹⁶'Barikan gërëgako, ga kën soŷanarand mëne bebësëm kën ri, arafënara fo kën rafënarand. Xarak, etoŷanara end mondako el ax ye ex na gë təkër ak. ¹⁷Awa ala an aŷwendëra ko wëndërand angëmëne exo nang anang edi ed enjekax el do axo dind na.

End bapela band bër gë napul enj

5 ¹Awa gërëgako, baxëtine wën bër gë napul bën! Tesin, keŷin mokeŷ gayik betëm këŷun wëcan! ²Napul irewën in iwërëk ex, oyame ŷamak banjëm bandewën baŷ. ³Kaŷe in do gë kodi irewën in aŷaner ŷanerëk. Ata aŷaner ijo kë hi osede or këŷun lëxw gër kiti ol, do aŷas kë ŷana ex ŷasënd beman bendewën beŷ ang xođux fo. Yama gër bakey bapelatar baŷo nde ŷala kën en gi gë napul isëm! ⁴Acosa and bër riyenik gër ocënga odewën do ŷambara kënëbi aŷ, këŷun lëxwënd mokeŷ. Do otes od bër kë xanand beneda bendewën ok hatëk xali gër banëf band Axwën, mëŷ ar xorëk beŷ dek an. ⁵Aliya liya kën gër ebar gë ecotëra ed napul, do gë bebër këŷun xëbënanënd el. Abët bët kën ang oŷacar or enjaŷ fo. ⁶Wën anëp nëp këno ar ŷenene an, alaŷ laŷ këno, xarak mëŷ abaxo hëp na endewën enj.

End ebuŷan enj

⁷Awa bëmaŷe, buŷayin xali yatir ko bakaw Axwën. Aŷan an aŷëni ko ŷënind ebar el xali ex cënan beneda bend ko liyaxënënd beŷ. Abuŷa ko buŷand elod gë ecaŷa ebeja xali gë ekol, exo kanaraxën beneda tęgët beŷ do gë bendundu. ⁸Wën bëte buŷayindën, kapinayindën gër oŷëkw orewën gayikwa akey and ko bakaw Axwën aŷ đam ex. ⁹Bëmaŷe, këren đëxwërënd na këdi këŷun xiti Kaxanu. Axiti an cëŷ, gër ebët xwëŷa ko đe. ¹⁰Bëmaŷe, end toro enj do gë end ebuŷan enj, tëfëtelinëbi bëlaŷënel bër laŷëndëraw babi Axwën bën. ¹¹Are këne rende mëne bër buŷa bax bën abeta beta këni. Awël wël kën ang buŷa baxo Yob ak,

bëte anang nang kën ang ĥata baxo aniyān and yël baŋo Axwën ak. Gayikwa Axwën an gë axaÿënan hi ko, do monënga nënga ko^d. ¹² Bëmaÿe, ax gi ex na dëŋ monjaŝaran, hik orën ol, hik ebar el, hik er ex yo. Deyindën tuŋ: «Iyo» angëmëne iyo ex eyakal do deyindën «Ali» angëmëne ali ex eyakal këdi kën hi bër kiti.

¹³ Ala ar kë sorond mërëxand irewën an, calelexo. Ar gë onënga an, ñerëwëralexo ojëkan od cale. ¹⁴ Ar ŝëxwërak an, macëlebi bëlëngw bër Amara bën. Do bën calenëleno sam eno nëm ogu gër oŵac or Axwën. ¹⁵ Cale ind gë ekwëta iŋ afakën këŋo fakën aŝëxwëra an, do Axwën an eŋo kanin. Angëmëne aŵëndëra ŵëndëra ko, aseban këŋo seban. ¹⁶ Awa putindën beñëŋënaŋ beŋ andewën rewën aŋ, do en calendërënd, en pakaxën. Cale ind ar ŝenene iŋ mbaŋ fangak. ¹⁷ Eli, ala ebaxo ang biyi ak. Barikan aŝale ŝale baxo kërëx tëb na, do ax tëb bana gër ebar xali xucak bëniy bëtās gë opacaŵ ocongibat. ¹⁸ Bëte ga ŝale ko gaŝëxe, orën ol sébëk, do ebar el ŝënanëk beneda beŋ.

¹⁹ Bëmaÿe bëndam, angëmëne ala exo nambëra xali exo ŋaŵëta ðal in, do abat mërëxand irewën eŋo bakaliw, ²⁰ nangëlexo mëne ar këŋo wërëŝët aŵëndëran gër fëña ir nambëra ko an, aracët ko racët aniyān andexëm aŋ gër ecës, do beñëŋënaŋ bendanjëm ko lab.